

MALONGI YA TATA PISEKOPO NA MISA YA KIYA YA SANTU

Bampangi batondama, bana ya Nzambi.

Bubu, na nkinsi yai ya Kiya ya Santu beto ke kusungimina makabu tatu ya nene nene ya Mfumu na beto Yezu-Kristu ke bikisila beto na ntwala ya lufwa na yandi:

- Ukaristia ya Santu, madia ya lugulusu ;
- Kiyeka ya kuvukisa ti ya kutambika kimenga ya Santu ya misa ya yandi mosi ke pesa na bantumwa na yandi ;
- ye nsiku ya lutondo na mbandu ya kukikulumusa ya yandi ke songa na kundima na kusukula makulu ya bantumwa ;

1.Ukaristia ya Santu, madia ya lugulusu ye ya mioyo.

Nkinsi yai ya kiya ya Santu ke longa beto na kusosa kuzinga na nzila ya lukwikilu, diswekamu yai ya nene nene ya Ukaristia ya Santu, diswekamu ya ikele kuluta mayele na beto ya kimuntu ye ke kangula ntima na beto na kudiyambula ya mvimba na lukwikilu na ndinga ya Nzambi.

Kana Santu Yoani na mukanda na yandi ya Kusonga (Apocalypse) ke zabisa na bantu ya me bingama na kutambula kisakramento yai ya santu ya Ukaristia bankwa kiese (Kiese na bayina ya yandi ke binga na kudia na mesa na yandi ya Santu Ap 19,9)ikele na kusonga bunene ti bumbalu ya Ukaristia na luzingu ya mukristu. Mpamba ve Ukaristia ikele madia ya kieleka ya ke kuyelisa moyo na beto bakristu. Beto fwete simba mbote nde kana bantotila ya ntoto yai ke pesaka na bantu na bo madia ya ntalu ntalu na ntangu ya bankinsi ya bo ke sala, madia ya ke pesama na ntotila ya bantotila, inki mutindu yo lenda vanda ve ya kuluta kiteso kibeni ? Sambu madia ya bantotila to bamfumu na beto ya ntoto lenda pesa na bantu na bo ikele kukatuka na kimwvama na bo mosi to na yina ya bo mene kuzwa. Kansi madia ya Yezu kele kupesa ikele ve yina ya ke katuka na kimwvama ya ntoto yai kansi nitu ti menga na yandi kibeni, ya yandi ta kutambika na zulu ya kulunsi sambu na lugulusu ya ntoto mvimba. Kele yandi kibeni ikele kudipesa na beto bantu na mpila nde beto kutambula luzingu ya kieleka. Madia ya yandi ke pesa ke kutwala beto na luzingu ya mvula na mvula. Madia ya bantu ya ntoto yai kulenda

ve kugulusa beto na lufwa bonso madia yai ya mioyo ya beto ke tambula na Kristu Mfumu na beto.

Disongidila nde ukaristia ikele nsimbulu ti kisina ya luzingu ya mukristu , ye ya kuluta diaka kiteso ya bayina ya mene kukipesa sambu na kisalu ya Nzambi : baminsambi, banganga-Nzambi , to diaka ya bayina yonso ya imene bingama na nzila ya kinganga-Nzambi. ikele Ukaristia ikele pesa na nganga-Nzambi ti na mukristu ngolo sambu na kuyelisa mbote luzingu na yandi ya moyo. Ye mpi Ngolo yonso ya Dibundu ke basika na kisakramento yai ya Santu ya ke vukisa beto ti Mfumu Yezu Kristu .

Kana beto kutala mbote na mikanda ya santu yonso ya ke kuzabisa beto mutindu ya Kristu imene kuganga kisakramento yai ya Ukaristia, ya kele simba beto na ntima na mbala mosi ikele ntete ntete mutindu ya yandi mosi Kristu ke kukifwanasa na mampa ti vinu ya yandi ke pesa na bantumwa na yandi. Ntangu yandi ke nangula mampa yandi ke zabisa na balongoki nde : yai nitu na mono ; ye ya yandi ke pesa na bo vinu yandi ke kubinga yo menga na yandi. Yo ke zola songa na beto disongidila kibeni ya ukaristia bonso kisakramento ya Kristu kibeni ikele kukisonga na beto bantu na kati ya mampa ti vinu. Yo ikele kidimbu ya mvukana na luzingu ya kinzambi ye ya ke sala mvukana ya bakristu na kati ya dibundu.

Beto fwete zitisa mutindu yina kisakramento yai ya santu , sambu bonso ntumwa Paul ke zabisa yo, « Muntu ya ke dia ti ya ke nwa ya kukonda kuzitisa nitu ya Mfumu, yandi ke dia, yandi ke nwa nkanu na yandi » (1Co 11, 29).

2. Kiyeka ya kuvikisa ti ya kutambika kimenga

Na lumbu yai mpi beto ke sungimina kisakramento ya ntumba ya Kristu me ganga ntangu yandi ke pesa na bantumwa kiyeka ya kufula na kusala mutindu yandi mosi me sala sambu na kusungimina yandi. Disongidila nde yandi me pesa na bo kiyeka ya kufula na kukitula mampa ti vinu nitu ti menga na yandi. Bubu, kiyeka yina kele na banganga-Nzambi. Yo ke zola kusonga na beto nde na konso mbala ya banganga-nzambi ke kutambika kimenga ya santu ya misa, bo ke fula na kuzabisa lufwa ya Kristu tii kuna ya yandi mosi ata kwisaka kuvutuka ; bo ke lungisa kibeni yina ya Kristu kusalaka. Nganga-Nzambi ke kituka mutindu yina muntu ya me solama ti ya me santisama na kulungisa

mvukana ya bakristu na kati ya Dibundu na nsadisa ya kisakramento yai ya santu santu ya misa. Yandi fwete zinga luzingu na yandi ya mvimba kabu yai ya lutondo ya Kristu ke bikila bantu na yandi. Mono zabisaka beno yo mbote mbote na malongi na mono na misa ya krisma ya kusalamaka na kintente ya santu.

Yo ke zola songa na beto na kusimbisa mbote mbote banganga-Nzambi na bo kuzingila diaka ya kuluta kiteso lubokilu na bo ya kuvukisa bakristu na nsadisa ya kisakramento yai ya misa ; na bo kuzinga na kati ya mvukana to ya bumosi na ndonga na bo ya kinganga-Nzambi.

3. Nsiku ya mpa, nsiku ya lutondo

Na ntwala ya kuyambula ntoto yai sambu na kuvutuka na Tata na yandi, Kristu ke songa mpi na balongoki na yandi lutondo na yandi ya nene nene sambu na bantu yonso. Mwana ya Nzambi ya mvimba, Mfumu ye longi, yandi ke sukula makulu ya balongoki na yandi. Yandi ke sala mutindu yina kisalu ya bampika vandaka kusala na bamfumu na bo sambu na kusonga na beto bantu nde , na luzingu na yandi ya mvimba, yandi me vanda nsadi. Yandi ke pesa na beto mbandu yai ya lutondo na yandi sambu na beto bantu. Beto mpi kutondana beto na beto. Yai nsiku ya mpa ya yandi ke bikisila beto .Beto fwete kuzitisa yo na kuzinga na kinduku ya kieleka ti bampangi na beto, mpila yina beto ta guluka. Beto tondana beto na beto bonso yandi mosi Kristu ke tonda beto. Beto zaba mpi kudikulumusa na ntwala ya bantu ya nkaka sambu na kuvanda bansadi ya kieleka. Beto sadisa bo na bandongisila, beto tala bambefo, bankwa mpasi ti bansukami. Beto lolula bambeni na beto. Beto widikila bantu ya nkaka.

Beto lomba nsadisa yina yonso na misa na beto ya kilumbu ya bubu. Bika nde mama Santa Maria kusambila beto na beto kuzaba kulanda mwana na yandi Yezu Kristu na Luzingu na beto ya mvimba.

Na beno yonso ngemba!

+José MOKO EKANGA

Pisekopo ya Idiofa